

全  
浙  
詩  
話

全浙詩話卷三十一

會稽陶元藻篁村輯

男

廷珍

編次

廷琬

仁和朱文藻映濤

參訂

同邑宗聖垣芥颿

明

章懋

懋字德懋蘭谿人成化丙戌會試第一登進士  
第改庶吉士以疏諫張燈被杖降南大理評事  
遷福建僉事考滿乞歸家居二十餘年宏治中

起爲南祭酒正德初引疾歸嘉靖初卽家拜南  
禮部尚書致仕卒贈太子少保諡文懿有楓山

集

靜志居詩話 楓山自言不工於詩故集中存者甚少  
嘗見思陵御書一幅詩云未央鐘動曙光生隱隱初聞  
柳外鶯風靜御爐香篆細日高繡座袞衣明螭頭陞擁  
黃麾仗豹尾斑聯白玉珩最喜及時勤庶政蒼蠅聲裏  
聽鷄鳴真跡存高上舍佑鈺處觀者疑爲思陵御製實  
楓山集中詩也惟及時二字集本作君王御筆改之是  
楓山一集曾歸乙夜之覽矣今所識於此以當開寶遺

事

湯滌

滌字新之嘉興人成化丙戌進士知清豐縣事  
有思庵雜稿

檇李詩繫 湯滌爲清豐令恒有歸志監察使聞其能  
詩命賦一律有半明半晦雲間月如有如無夢裏官之  
句使覽之疑其隱諷湯謝曰此滌自輕其官也將去矣  
取印綬置案揖而出行李蕭然士民攀泣有思庵雜稿  
潘蕃

蕃字廷芳崇德人成化丙戌進士由刑部郎出

知安慶歷山東湖廣布政使擢副都御史巡撫  
四川督兩廣陞南京刑部尚書謫戍甘肅後赦  
歸復官

靜志居詩話 尚書馭歷中外於蜀於粵屢立戰功以  
忤劉瑾被逮與劉忠宣同戍甘肅瑾誅復官優游林下  
簡樸如貧士時人爲之詩曰尚書歸來無第宅稅地種  
花兼種魚舉網打魚魚換酒花前醉倒老尚書

樊 阜 敬 叙 源 通 昌 甫 貴 鐸

阜字時登縉雲人成化戊子舉人官延平儒學  
訓導有樊山摘稿

靜志居詩話 括蒼山壤風雅之士寥寥獨縉雲樊氏  
門才頗盛時登而外曰敬公慎曰叙公倫曰源時濟曰  
通時亨曰昌永盛曰甫永美曰貴永芳曰鐸伯廣皆能  
詩叙有用拙稿源有竹軒稿昌有友菊詩甫有礪櫟集  
貴有桂岡集鐸有畏齋存稿惜乎流傳者寡矣

馮蘭

蘭字佩之餘姚人成化己丑進士改庶吉士仕  
至江西提學副使有雪湖集

靜志居詩話 謝木齋以宰輔歸田與佩之締姻日以  
詩札酬報澶淵劉應徵知縣事爲刊湖山倡和詩二卷

集中句可採者謝如嘉客不來虛掃榻好山難致卽移  
家路當樹與雲深處舟及潮隨月上時野色遙連晴樹  
杪秋聲忽動暮鴉羣樓臺月上寒雲盡村巷泥乾宿雨  
餘扶老最便方竹杖入秋却愛早禾田馮如鏡裏流年  
從老去山中舊業得生還遠林返照明邨落斷岸分流  
入海田絕頂夜晴先見日中峯春暖易生雲雨疎籬落  
菊開晚水涸湖田鴈下遲秋晚菜畦依水種日斜村媪  
過隣春雲中僧住茆茨屋雨後人耕斥鹵田沙淨雨苔  
無屐齒竹深秋墅有碁聲雷霆忽作三更雨江海疑生  
六月冰燈火誰家無樂事江湖長夜有離人城市已無

踪跡到江湖合有畫圖傳其詩頗難優劣洵同調也

姚江逸詩

佩之在京師與李西涯謝木齋三人雅相

好木齋歸田與佩之倡和無虛日間書之以寄西涯西涯亦一一和之有云惟應兩巾履長得夢中遊又云羨君江海上猶有舊同遊是時西涯爲一世宗工而於佩之敬爲老友也佩之西涯同有樂府詠史號爲新體今西涯樂府已流傳佩之無有能舉之者矣

康熙己亥紹興府志

佩之專工於詩好次險韻愈出

愈奇謝遷雲樹望穹雙淚眼湖山恨滿幾詩消所謂哭雪湖者是也同年屠侍郎偶話舊事與某郎中笑其身



死妻子流落已而出棋枰圖索題蘭題之曰白雲堆裏  
□公亭亭下只遺空石枰相逢莫自誇高手一遍輸來  
一遍羸屠遂嘿然

潘 正

正字應昌號留鶴天台人成化丙戌進士歷山  
東提學僉事

三台詩錄 留鶴草書奇拔詩文自成一家與陳白沙  
吳匏庵友善唱和名動一時賞論詩有五聲全備者少  
惟得宮聲者最優可兼衆聲李太白杜子美之詩爲宮  
韓退之之詩爲角以此例之百家可推蓋其父受之鄉

先輩者也子夔號野泉女號若天道人並工詩百可  
漫志留鶴泰山詩混沌以來惟此老乾坤之外更無山  
近莊定山詩云開闢以來元卽此蓬萊之外更無山句  
法默相符合

屠勲

勲字元勛平湖人成化己丑進士授工部主事  
歷官大理寺卿副都御史巡撫順天轉刑部侍郎  
晉尚書加太子太保致仕卒贈太保諡康僖  
有東湖遺稿太和堂集

靜志居詩話

吾鄉先正若呂文懿有子秉之屠康僖

有子文升詩名皆勝其父然兩公韻語亦自成家屠集  
如浦樹遠分揚子渡江風吹過石頭城吟看鴈影秋來  
早坐聽潮聲月上遲夢裏只疑身有翼燈前未信眼生  
花江湖路遠身仍健天地恩深罪亦宜野寺可能添一  
榻水田應只欠雙鷗山腰樓閣天低樹江上人家水拍  
城八韻八義皆秀句一年一度此深盃均饒風致宜西  
涯篁墩守溪邃庵諸公交相和酬也

黃韶

韶字九成餘姚人成化己丑進士官至江西提  
學僉事

浙江通志 韶有道南十景詩與張弼桑悅唱和從子  
嘉仁字丰山於何李時不染習氣詩情嫣然秀出

司馬堊

堊字通伯山陰人仕終福建副使

山陰縣志 通伯博極墳典成化辛卯冠省試明年成  
進士以御史視學南畿考文序士無錙銖失平擢福建  
副使致仕歸縱情丘壑嘗榜其門曰獨呼明月常陪醉  
不負青天早放閒所著有蘭亭渚集

呂憲

憲字秉之秀水人文懿子以蔭爲國子生授中

書舍人成化辛卯上疏乞應試中式歷官南太僕少卿改通政司擢太常卿有九栢山房存稿  
靜志居詩話 太常詩名藉甚朝野特爲吳中文沈諸君所推重人不敢以任子視之是時詩派方習爲纖麗圓熟太常獨好盤硬語宜其傲睨一世也六十詩云治蠶社酒分隣父含笑山花付侍兒移病詩云官衙馬瘦無餘粟海國魚鮮正晚潮寄友詩云愁無起老青精飯夢有藏書白石龕皆瀟灑可誦

楊 榮

榮字時秀餘姚人成化壬辰進士官工部都水

主事

姚江逸詩 都水工於詩會試舟中取唐音和之月餘  
成帙一時風尚和唐音者累累而都水能得其風致徐  
泰詩談與慈溪張楷同品書學懷素尤善畫竹

謝遷

遷字于喬餘姚人成化乙未進士第一人宏治  
中以少詹學士入直內閣歷少傅禮部尚書武  
英殿大學士罷歸嘉靖初再召晉謹身殿大學  
士尋致仕贈太傅諡文正有歸田稿

明詩綜

李時遠云水齋歸田後專事吟咏有冲澹閒

雅之趣山莊一首真得陶家情景

姚江逸詩 陸淵字深之成化壬辰進士歷提學御史  
福建參政謝文政受業其門故文正有師門事業吾慚  
負之句三子皆進士馮雪湖詩飄然詞氣欲凌雲四陸  
家聲海內門亦一時盛事也

洪 貫

貫字唯卿鄞人成化丁酉舉人鄧州教諭歷知  
從化政和二縣事有太白山人稟

甬上耆舊詩 唯卿先生詩法盛唐嘗擬杜陵秋興八  
首傳至京師李文正大加賞歎晚結廬東皋自號稼翁

年九十尚不忘摘翰每一詩成好事者輒傳寫焉

盧格

格字正夫東陽人成化十七年登進士第官至  
江西道御史巡按廣東有荷亭集

靜志居詩話 正夫難經伉伉雖朱子亦不心服其讀  
易詩云三聖若專尊卜筮宜尼何用絕韋編又云世儒  
問我五經原易道原居六畫先若說義文專卜筮街頭  
盲瞽盡真傳又咏詩云夫子刪詩立義精國風雅頌各  
分明考亭半作淫奔什何用爲邦放鄭聲所撰荷亭辨  
論八卷同郡章楓山不以爲非戴山劉念臺爲作集序



而曰後儒不及前人由其果於自信之意多而存疑者寡也幾於袒左矣

戴 豪

豪字師文號敬齋太平人成化戊戌進士歷任  
廣東參政

三台詩錄 敬齋次陸職方睡起歌韻半窗新雨未全  
涼客思荒荒日苦長四月人家無麥飯五侯賓館有荷  
香病兼汗甚秋能療心爲愁多夜亦忙歌罷伐檀聊隱  
几夢中無數越山蒼民窮上侈病有過時愁無己候徒  
留此無益之身所以思歸借題寫志非泛常酬和之作

黃 備

備字汝修號方麓太平人成化辛丑進士官終  
文選郎中贈尚書

三台詩錄 方麓許縣舟次云新月照平沙輕烟籠遠  
樹遙聞犬吠聲始覺人住處與鷄鳴知有人同一意境

周 澤

澤字天雨嘉善人成化癸卯領鄉薦第一登進  
士累官福州同知轉贛州

兩浙名賢錄 澤博學有才爲文清婉詩亦工雖不多  
作每一言出人競膾炙之

沈中畏

中畏字警存號荆門嘉興人

攜李詩繫荆門爲詩酷嗜李于鱗嘗赴省試過按察司徘徊不去人問之曰吾思李于鱗耳人問于鱗爲誰因占一絕云策蹇來遊過臬司濟南文物著當時峨嵋天際空相憶說與君家總不知一笑而別

陳世良

世良字崇之號青巖臨海人成化丁未進士累官都御史

三台詩錄

青巖和趙侍御煎茶歌云寒夜床頭酒甕

虛呼童瀹茗坐更初夢魂不放迷莊蝶眩暈能醒校魯  
魚蝦眼含珠真顆顆蜋聲出竅漸踈踈箇中風味誰能  
識浪費千金一醉餘輕倩秀雅置之元人玉山草堂雅  
集中幾如楮葉之亂真

楊子器

子器字名父號柳塘慈溪人成化丁未進士仕  
至河南左布政使有柳塘先生遺稿

靜志居詩話 名父早朝詩多至三百首其終篇云除  
却早朝無一事更從何地效馳驅可想見承平景象矣  
排節宮詞若落盡燈花風定後移來樹影月明初已判

聖恩非我分不傳私語到人間詩可以怨不其然乎至  
於春花將及九分九天氣又新三月三則尋常百姓家  
皆可道之不類深宮中語也

夏鏤

鏤字德樹號赤城天台人成化丁未進士官南  
京大理寺評事有赤城集

四友齋叢說 夏鏤天台人號赤城王石梁先生鄉人  
也石梁甚重之嘗憶得石梁舉其七言律二句雙禽自  
卧青苔巷一杖驚飛翠竹牆此詩亦失之尖新似南宋  
人語惟咏麻姑酒二句云紫泥四尺高於軀使我未飲

先愁無頗跌蕩可誦

夏時正

時正字季爵仁和人登三元商輅榜進士成化間列卿致仕

湖墅詩鈔 夏時正字季爵登三元商輅榜成化間列卿致仕藩司甯良等於孤山建書院以居之大司馬徐忠襄有身如五柳先生懶心似孤山處士清之句時孤山書院種梅方伯祁陽甯公攜樽見過夏公乃賦詩云占斷層崖學種梅呼朋踏破白雲堆自憐結屋青山住不謂乘春畫舫來竹下倒裳迎使節花間供具促吟杯

却非詔遣旌求急鴈鷺無煩着意猜

陳選

選字士賢官御史

三台詩話 湯廷尉日錄陳士賢選爲御史出按江西  
除夕有詩曰高燒銀燭照星河栢府沈沈二鼓過一歲  
光陰今已盡百年事業欲如何身衰報主心猶壯宦達  
思親淚更多明日喜看成化歷綠衣春殿正傳臚未幾  
有南畿提學之命公文名直聲素孚於時宗主斯文之  
任固宜此詩特舉其概耳

夏塤

塌天台人

三台詩話 畜德錄都御史韓公雍與天台夏公塌飲  
出令欲一字內有大人小人復以諺語二句証之韓曰  
傘字有五人下列四小人上侍一大人所謂有福之人  
人服事無福之人服事人夏云爽字有五人旁列衆小  
人中藏一大人所謂人前莫說人長短始信人中更有  
人

謝省

省字愚得黃巖人居陶夏由部郎知寶慶府

三台詩話

陶夏謝太守愚得省由部郎除知寶慶府



務以德化百姓然淡於宦情返郡書感曰竹馬重迎太守還年豐事簡吏民間寇君暫借終難久先有歸心在故山未幾致事又賦一絕云解綬浮江出郡陵一麾天地鬢星星小舟蕩漾空無物載得民情過洞庭歸築逸老堂倘徉林下李賓之程克勤兩學士高其志郵筒數千里疊相倡和弟績號王城山人與太守自相師友詩初規盛唐晚專意少陵其格益進

馬兼善

兼善會稽人

吳越所見書畫錄

元錢進士一曲因緣卷選自題云

郵亭昔日好因緣一曲絃膠知幾年爲愛秦蘭翰謹獨  
至今摹作畫圖傳此陶穀之故事陶穀出使丰儀嚴介  
可畏韓熙載密置名妓秦弱蘭於郵亭穀施之贈以一  
曲明日設宴卽令弱蘭於席前歌此曲穀以爲愧舜舉  
此圖淺設色器皿用細界畫施以金絲兩人授曲情狀  
神色靜穆得北宋人工緻刻劃之妙會稽馬兼善詩曰  
一曲郵亭詠弱蘭聲名從此玷儒冠展圖不覺興長歎  
自古爲人謹獨難

李忠

忠仙居人成化間歲貢生穎上令

沐雲詩話 王先培詩云不緣老去名心薄已覺情多  
世事非雖情致恬淡尚有憫世之思若李忠歸田詩云  
耕破白雲四五畝睡高紅日兩三竿則翛然世外矣

王亞夫

亞夫天台人

沐雲詩話 石梁詩多以龍爲喻如洪适詩宛然卧蒼  
龍夭巧謝深鑿曹文晦詩兩龍爭壑那知夜王壙詩橫  
空驚見玉龍飛諸葛義詩六龍挾雨出銀漢雷聲下擣  
千尺淵李東門詩如龍藏首尾終不如王亞夫詩云瀑  
飛雙澗合崖斷一橋分清切自然

平顯

顯字仲微仁和人成化間以薦授廣西藤縣知縣謫戍雲南有松雨齋集

蓉塘詩話 錢塘平仲微名顯成化間人能詩嘗見其題黃鶴山人王叔明畫一律云我昔見之湖上居當門萬朶翠芙蓉承平公子有故態文敏外孫多異書閒吮彩豪消白日夢騎黃鶴上清虛此圖定倚吳山閣醉點南屏春雨餘詩旣脫灑亦吾杭之詩豪也

宋恢

恢字宏之鄞人

甬上耆舊詩 吾郡詩至宋宏之先生始錄天順成化間名士詩二十人曰四明雅集於是江南戴先生因所選爲廣之得五十五人仍其名東沙張先生益廣之得一百五十一人更名曰四明風雅至崇禎中陳太僕陸中翰諸君復附錄吾鄞詩得四百四十七人名曰甬東詩括蓋此邦文獻之傳數百年間得世有所徵俱宋先生祖構之功也

豐越人

越人自號天放野人鄞人

甬上耆舊詩 越人性不喜交輦上人以詩應酬常見

一時山人行卷所錄詩率爲某公壽賀某公赴官輒唾  
之曰詩以道性情豈爲汝輩行乞耶及見少年人作詩  
多雜調謔更正色相戒無爲風流罪人故時謂先生詩  
有林泉無朝市有懷弔無譽頌有流連無褻慢足盡洗  
詩家之陋其高懷似陶公而復少閒情一賦所著天放  
野人集四卷

應 泉

泉字仲鵠鄞人諸生

甬上耆舊詩 一日余與客論里中詩或云應仲鵠所  
作亦無佳句余不答徐出所錄村居詩數首中有句曰

春田雨足騎秧馬秋隴禽多縛草人又曰十畝桑門賢  
者地三家草市酒人天客大欣賞以爲得如此絕佳余  
曰此應仲鵠句也

李端

端字文正號櫟軒鄞人布衣

甬上耆舊詩叙傳 先櫟軒先生端詩有重名家乘載  
里中諸公輓先生詩如范公麟曰一筇花塢斷三雅日  
湖空屠公瀟曰鏡中華髮無來往庭外青山謝主賓周  
公相曰渡海詩傳百濟去及門業盛五經分陳處士鵬  
霄曰浮白何人開韭席踏青無地試芒鞋楊公叔通曰

高舉已傳從鶴御冥心早見製荷衣俱一時名作可傳也

寧波府志 李端爲詩逼肖唐人時與金太僕湜倪處士光魏學博偁締爲詩社日本貢使歸懇求端詩爲贈有肩挑雲影江頭別衣戴天香海上還之句人傳誦焉  
李正華

正華字本素鄞人所栖草堂手植雙棟於門人稱爲棟塘先生

甬上耆舊詩叙傳 先棟塘先生正華次子循義以進士起家爲名御史嘗有太守秦君造謁先生款客語止



宿已見十餘人從田間輟耕歸俱笠而荷鋤犁中有二  
丈夫鬚眉甚偉與諸田奴別秦君心異之使遣問則先  
生第三四輩子也秦君大驚曰是俱是御史介弟奚至  
使執苦若此先生笑謝曰若兄雖貴何與弟且人豈可  
使失業因故筐取所自咏詩示客指其中二語曰人薄  
利名何患老子分耕讀不妨多秦君絕歎服云

周致

致字維遠鄞人授臨淄縣令

甬上耆舊詩叙傳 周維遠少孤出依延慶寺爲僧工  
詩方伯楊公守隅見而奇之因命養髮攜之入京從學

於蕭山李公李公館之得授徒自給後中進士西涯李公聞而撫掌曰此和尚竟得甲科矣出知臨淄縣有異政卒官民爲立祠初李公旣館惟遠復與議婚梁氏女惟遠上李公詩曰一從領袂侍公門復我衣冠助我婚此後有人傳故事卽今無地報深恩一時俱誦之

唐 廣

廣字惟勤湖州人安吉醫官自號半隱

明詩集傳 唐廣字惟勤吳興邱大祐有詩名纖麗似溫李廣一變爲中唐冲淡類韋柳張淵子靜其所造也

倪 光

光字應奎鄞人有味易詩集

甬上耆舊詩 應奎感土木之變學孫吳書講劍術既  
久無所合乃更杜門學易輒能前知人因以小康節呼  
之學者稱味易先生年八十生而舉殯擬陶公自祭杜  
牧之志墓事懸像設奠延慶寺爲詩自挽羣公俱屬和  
金太僕別畫竹題一詩相寄曰先生舉殯吾爲寫生其  
詩有言舉世稱高士闕天合少微光得之大喜其作達  
如此前輩謂其古詩最工七言効初唐音格流麗近體  
不減王右丞余觀其佳句如秣陵道中曰路柳官橋晚  
山花野店春寄金文用曰萍開魚弄日花落蝶愁人泊

瓜洲曰平林藏宿霧疎雨帶春潮隱居曰岸風落藤子  
晴雪上梅花宿山家曰水清溪近戶楓老葉歸林閒居  
懷鄭蘭谷曰燕窺花逕暖鶴護草堂清病起有懷知己  
曰海濶成鷗夢風高斷鴈心幽居曰野雲當戶過青草  
閉門閒送李公子還鄉曰江風催去櫂戍鼓接行裝過  
七里灘曰白石依樵爨青山隱釣臺遊崇法寺曰青山  
應作主黃鳥自留人遊東林庵避暑曰殿涼風氣入池  
午藕花開屏跡曰遠山隨水下細雨帶雲深早春遊虎  
邱曰萬水浮光去諸峯接翠來遊上天竺曰萬竹巖前  
雙鹿卧百花林外一鶯啼商王寺曰天垂紫鳳籠雙塔

路引青松入雨廊奉寄尹天官曰陰崖短竹含霜老幽  
谷薌蘭背日生題蜀中山水曰路遶山川通漢時花明  
樓閣入唐風客中書懷曰蘿掩破籬花自老門生新竹  
燕還飛弔岳王墳曰宋樹參天無北向吳江抱地盡東  
流雨後閒行曰新水短蒲魚戲日暖風新巷蝶尋花俱  
氣溫詞麗真不亞盛唐也

王佐

佐字仁甫號古直老人太平人

三台詩話 吾鄉王仁甫佐善草書工詩客公卿間三  
十年不置釜甑無童僕意度直率不爲崖岸遇所會意

欣然忘去李西涯爲作古直老人傳又贈詩曰長安信  
脚自來往醉醒不知東君誰其風度可想也嘗和西涯  
咏雪蒸字韻往復出新意方石亦有作聯成長卷失去  
經歲卽郎中國寶購得歸之 王古直詩多擺脫俗蹊  
見清湛如題嚴陵云天地此生惟故友江湖何處不漁  
翁遊西山云舊時僧去竹房冷今日客來山路生述懷  
云窮將入骨詩還拙事不縈心夢亦清此類皆麓堂詩  
話所賞成化丙午八月古直老人與黃巖王存敬荆部  
詣楊君謙循吉趙栗夫侯公繩陳一夔徐栗夫皆會出  
白蓮花酒用二小銀盃酬酢六公皆朝官獨古直以山

人居南向左第一餘以次坐適雨作相與聯句二十一

韻凡三巡而畢以老人起取詩云高筵做秋雨直古頓爾

淨餘煇得非洗吾塵徐似欲添君酌堦前渠溜走趙燈

下簷花落來迎路遂阻陳坐久衣轉薄暫停得耳淨王

忽至令心愕蕭蕭佐歸懷楊潺湲亂歡譁翻盆入社詠

侯名亭見蘇作浸深墻可危古直泛滿庭堪濯徙穴蠹何

智徐歸林禽亦樂來如銜枚陣趙響失巡更柝諸公競

解帶陳羣僕皆赤脚積陰已連朝王浮潤光徵昨良賓

坐自古楊好寓投不錯決明色猶鮮侯梧桐葉方索滴

成老況愁古激起鄉思惡吾方利河漲徐我亦思殿着

試將聽官舍

趙

何如枕山閣朝街泥想尺

陳

漏池水驚

勾忙身夜竊暇

王

病體涼得葯對酒今則同

楊

逐事明

又各搜吟思既倦

侯

願且更束約

古

爾我交評咸以爲

佳無可易方聯句時一人秉筆構思六人無事乃出令

各賦詩一首又各自占一人相贈答詩多止錄古直老

人王刑部并徐工部作蓋徐雖籍海寧實亦吾鄉人也

古直詩秋雨繞簷聲滴滴夜堂燒燭影輝輝自憐玉粲

身飄泊白首人問尚未歸贈楊云秩宗聲譽滿京華壯

歲詩文老作家病後愈加才力健不教天上草黃麻又

答楊贈文章真可儼前賢江海知名已十年手裏長篇



許贈我老夫今夜不能眠王刑部詩七賢言志一燈前  
次到迂夫獨莞然食祿十年官再徙不曾留得買書錢  
贈陳云君家垣西低草堂常有數斗白銀漿五十官卑  
人不識時時詩裏吐紅光又答徐贈問字纔休已駕車  
我來還復挽君裾留連未說鄉情好今夜詩壇已要渠  
徐工部詩黃金臺下雨聲稠白玉橋邊水亂流戀闕思  
親情更切不堪今夜故人留贈王云根在丹崖葉在吳  
百年鄉思豈能無對君欲贈平生意愧乏一雙明月珠  
又答侯贈山思天竺連峯碧鱸憶松江出水紅兩地相  
過殊不遠他年杖履可能同時天已四鼓矣諸公始散

去獨古直留楊署明日王刑部遣騎迎之去楊有七人  
聯句記錄此見前人風雅聚會之樂而吾鄉之多才也

唐世瀚

世瀚字二水別號宗之烏程人諸生

詩衡 曾波臣自閩還過訪留飲宗之贈詩云有客鬢  
十年疑小換交情千古只如初此等語非詞壇老手不  
能得也

李令哲

令哲字霜回歸安人庚辰進士

烏青文獻 霜回詠落花云餞影夕陽西殘脂半瘞泥

弄情雙燕蹴恨別暮鴉啼蜂過還相逐萍浮擬暫棲料  
誰重見惜流夢到深閨其遲暮摧殘之感極矣

高士潔

士潔號固山樵者天台人

三台詩話 固山樵者高士潔少承祖牧菴家學藐然  
孑立羣守屢辟不就有句云天應許我飽藜藿夢亦無  
心上廟廊督學徐蕃劉瑞先後造訪片語應酬而已未  
嘗詣謝也

陳函輝

函輝字寒山臨海人

詩衡 寒山題唐二水樗園集云宗之八仙位其一天  
錫如椽五花筆臨觴頌酒稱唐風不媿文壇作者七語  
甚灑落第不解其末句何所指劉伶墓云死豈人埋得  
言猶歸可聽翻案意新

王 印

印字信夫號虛舟蕭山人

菊坡詩話 虛舟詩所傳甚少惟春夜不寐一絕爲人  
傳誦詩云玉漏聲傳夜月涼懷人不寐坐銀床不知門  
上春多少夜半移燈照海棠

林貴兆

貴兆號白峯天台人官都昌令

三台詩話 團浦林白峯貴兆令都昌有冰蘖操自以不能折腰事上官投劾去父老泣留公別以詩曰湖邊植柳維官騎柳未成陰官已去殷勤父老莫留衣舊瓢曾挂衙前樹又時艱無計緩征輸一夜憂民鬢已絲唱斷南風人不見只留春色在棠枝士民思慕爲立祠同時葉郎中敬之初授新城令清節亦畧相埒自署其門云空庭不掃三分雪泰宇長留一脈春內陞後卒以伉直罷葉自號海峯吾鄉有二峯之稱

寅字公亮永嘉人

萬歷溫州志 公亮能詩善奕復精軒岐家言斗室虛  
窗無纖俗物嘗自壽有云苦吟未免逋詩債賣藥差能  
辦酒錢卽其實錄云易白樓中丞謫永嘉與之昕夕倡  
和所著詩多散佚間有藏其稿者

沈 概

概字一之號平齋嘉善人正德間授江西布政  
使司都事

風雅閒談 沈南疑稱其古詩詞旨沈鬱力矯頽靡余  
讀其秋興七律至天風輕吹野水碧江月欲上寒雲飛

之句亦自高澹不羣

蔡友

友字宗學蕭山人宏治元年舉抱德懷才提延平府教授

菊坡詩話 宗學題陳搏圖大笑騎驢入華山烟霞泉石伴清閒宋家社稷三遷後不了先生一夢間登芸閣云痛飲梨花酒滿壺畫欄憑醉不須扶驚人有句身偏穩笑殺當年莽大夫俱有思致幽居云晝長少客過看竹春盡無人叫賣花寫幽子亦透闌

黃傳

傅字夢弼蘭溪人宏治三年進士知江陰縣人  
遷貴州道御史有白露山人集

金華詩錄 白露山人與北園居士志大言大奮於進  
取約畧相似殆古所稱狂者歟其論事則山人更深厚  
而周詳應都臺求言事目應提學試策指陳剴切若有  
可坐言起行者非總百揆之任有魚水之契未易得其  
遭逢也爲詩則抒寫性真不求工字句亦與北園相均  
要其至者卓卓可傳

戴 乾

乾字元之號丹崖臨海人宏治庚戌進士官御



史巡按湖南

三台詩錄 乾有丹崖山舍詩嬾散林泉白鷺巾晚風  
深翠著閒身初歸社燕還疑主慣集沙鷗獨近人多病  
藥欄憑欲遍踈慵詩卷掩常塵封章刻漏年來事却向  
山中入夢頻身雖退隱不忘國事平日立朝風節不問  
可知

童琥

琥字廷瑞蘭溪人宏治三年進士官至江西按  
察副使有梅花集句和百咏梅花詩寫懷釣臺  
拾遺諸集

金華徵獻畧

梅花集句至今傳誦其精者五言如皎

月散清影東風聞暗香晚香傳遠樹春色上寒梢野渡  
冰生岸孤村雪擁籬孤標能自保一壑不妨專籬踈還  
有艷樹老半無枝不知春色早已與歲寒謀城曉風高  
角山空月滿樓此時逢國色何處避春愁獨有烟霞染  
不知霜月寒七言如暗吐幽香穿別院數將踈影上彫  
闌半灘流水浸殘月一片寒光接素霞愁生細雨寒烟  
外夢繞孤雲落照邊兩岸嚴風吹玉樹一溪春水浸雲  
根素影只應天上謫繁星疑自月中生薄薄遠香來澗  
谷微微春色染林塘謝客瓊枝方貯眼漢宮嬌額半塗

黃臘盡山中三尺雪月斜樓上五更鐘越使可能千里  
致故人不寄一枝來孤根欲老冰霜國晚節猶存鐵石  
心幽香入室有餘韻老樹著花無醜枝明月自來還自  
去東風吹落復吹開童氏所居卽香溪故里明時甲第  
聯翩而三童最著士論評其家學精則童品博則童琥  
兼之者俊也

陳垣

垣字子崇號一崖臨海人宏治壬子進士由國  
子助教擢汝府長史

三台詩錄 一崖在太學時常有句云出門騎無馬袖

攜驢子錢其風致可想見矣有一崖集與弟龍山時人稱二陳

孫 燧

燧字德成餘姚人宏治癸丑進士授刑部主事累官右副都御史巡撫江西宸濠反抗節死贈禮部尚書諡忠烈

樵書 孫忠烈公殉濠之難者也自顧巡撫之命已預辦矣其過草萍驛詩云綱常自古要擔當弱水誰將駕葦杭嶺道風行豺吻厲海天雲濶鴈飛將身曾許國頻加愛髮爲憂民忽變蒼醉飽恩光何以報寸心應不愧

朝堂王文成定濠之變者也其鄱陽戰捷一律云甲馬  
秋驚鼓角風旌旗曉拂陣雲紅勤王敢在汾淮後戀闕  
眞隨江漢東羣醜漫勞同吠犬九重端合是飛龍涓埃  
未送酬滄海病懶先須伴赤松今總述二公之詩者一  
以見忠烈公殉難之豫其詩慷慨一以見文成建功之  
卓其詩雄偉云

姚江逸詩 其集皆素疏無詩得其題壁一首公不必  
以詩著然詩中不可無公也

按題壁一詩元成梨洲兩家所述互有異同逸詩以  
誰將作將誰射吻屬作射迥違海天作海邊雁飛將  
作雁飛忙身曾作身從寸心作寸丹應  
不作惟下蓋以採自傳聞不能符合也

又按宏治壬子省試闈中夜間有二巨人衣緋綠東西立大言曰三人做得好事忽不見已而燧與王守仁胡世寧同舉及宸濠之變胡發之燧死之王戡平之鄉人傳述其事至今稱爲美談及查通志及卽邑志選舉并是科題名錄祇有孫燧王守仁並無胡世寧則當日闈中世寧同試與否俱未可定三人之數神言似太無把鼻或云三人原素善同祈夢南鎮將寐忽聞空中有語云云不解何謂達旦各散去及宸濠叛始驗其說較有依據

### 陶履平

履平字水師號曙齋會稽諸生

陶氏隱德傳

生平慕唐白居易爲人所作詩近之而

古體尤勝年七十七猶緇綴先世遺稿未嘗少倦疾革手書一絕以遺子孫曰操觚當此際微喘不留餘遙想

趙無恤三年讀父書遂卒宗人聞之泣下相謂曰吾族失典型矣

陶諧

諧字世和號南川會稽人宏治乙卯解元丙辰進士歷官兵部左侍郎贈尚書諡莊敏

周文燭莊敏公行狀 公謫配所肅州興疾就道諸送者淚下不能舍公朗吟曰只在乾坤裏何須歎別離聞者壯之所過輒題詠在肅與大司馬劉公大夏大司寇潘公藩時相倡和爲西行漫臬若牧羊臺賦蘆鴈橫塘等詩托物寓意忠厚婉順綽有離騷九章之風

按武廟初閣宦導上御覽決旬不止會風雹拔社木  
飄殿瓦公上疏極言斥瑾聚永成罪乞治之以法時  
遣中官往江南抽運木極力爭之有詔罷遣又諫差  
官賣鹽織造皆切指瑾輩瑾等銜之尋撫他事陷公  
杖爲民未平其憾復指稱與太學生劉健謝遷王守  
仁及名士五十三人爲黨錮復駕言巡視十庫時乏  
御用物械至京師下錦衣獄又杖之謫戍肅州當公  
再杖時瑾等遣從騎械送詔獄杖殺之己舁出矣家  
人不取近會有親識知其冤溺口中始甦乃赴肅及  
瑾誅始放還嘉靖改元召復原官陞江西按察司僉  
事轉河南河防道副使俱著有政績擢參政陰畫奇  
計擒太行賊陳卿遷右布政尋轉左擢副都御史提  
督南贛陞兵部侍郎總督兩廣廣盜充斥嶺海僭號  
者甚衆公先誅海寇許折桂陳和瑞旋出師潯州破  
石馬仙臺諸山寨斬酋雷公招向公抵邛進兵東西  
山四路並擊覆巢俘斬名賊無算平其地置戍而還  
又戡瓊州黎佛勦二七山之鄧大璇遂攻大帽楊旗  
之文興隆林宗福李廷彥盡破滅之在粵前後凡六  
出師計所斬首虜三十三級羣賊一萬二百有奇生  
擒五千一百有奇納降卒二千七百有奇戶三百八



十有奇爲寨一百二十五處爲岡五十二處膽識與朱變元相似而深沈謀慮殆備過之吾宗止蹟建樹以公爲最其真節豐功具載史傳大學士呂本云公風節在諫垣善政在藩服勲績在臺憲而行義在鄉黨數語已足見其概云

章元梅

元梅字和德樂清人宏治乙卯鄉薦授湖口令值宸濠難因縣無城郭帥民保他所與朝貴有隙欲陷以罪御史直之乃釋有千峯集

溫州府志 和德解官歸垂橐有伍福者貸之金元梅賦詩有人憐薄俸官中盡天予殘生亂後歸旬後廿餘載湖口民猶諳其宰移文問前章令君安否著有千峯

詩集與未諫齊名

趙崇賢

崇賢字彥達號次山太平人仕道州牧

三台詩錄 次山送吳參戎之西蜀云含笑誰云蜀道難劍光遙射雪峯寒碧波草色新詞賦白羽風情舊將壇擁節遠征誇介子揮戈一出破樓蘭行看幕府功書最早晚金貂上武冠色澤風神氣鬼無一不妙七律上乘何減同時李

朱諫

諫字君佐樂清人宏治丙辰進士仕至吉安知

府有蕩南集

溫州府志 樂清前輩有朱諫太守章元梅縣尹二君  
家傍雁山挂冠後往來酬倡頗有佳致朱才敏給注李  
詩及辨疑等錄雖未厭衆口亦畧見雅尚千峯尤清貧  
嗜酒有陶公風爲湖口令時有一絕云霏霏細雨濕烏  
紗十里長亭近酒家半醉倩人扶上馬短鞭敲落碧桃  
花

秦禮

禮號樗菴臨海人宏治己未進士官終福建按  
察使僉事

三台詩錄

榜菴謁鄭廣文祠云野狼負國長安沒  
逕裘富貴驚相蟻填胸氣欲吞崑崙肯從溝瀆埋名節葵  
心一點靈武傾封章密達天日明由來直道巧不足江  
南匹馬生前行江城二月春風早桃柳吹噓顏色好才  
名落落八百秋風烟幾度星霜老雕甍繡闥一時新鐫  
金戛玉皆陽春敬將一瓣拜階下悠悠光燄斯文真廣  
文徜徉於市令當時果甘汙僞命杜老必不肯曲筆許  
以直道援靈武密章一節觀之其不忘君父殊勝凝碧  
池頭一詩也持論確然非故爲古人翻覓江城二句指  
廣文訓教台人

王守仁

守仁初名雲生字伯安餘姚人宏治己未進士  
除刑部主事改兵部疏劾逆瑾杖闕下謫龍場  
驛丞累遷左僉都御史撫南贛以平寧濠功拜  
南兵部尚書封新建伯卒贈侯諡文成從祀孔  
子廟庭有陽明先生集

筠廊二筆

王文成題開先寺壁云中丞不解了公事

到處看山復尋寺尚爲妻孥守俸錢至今未得休官去  
三月開花雨度來寺僧倦客門未開山靈似嫌俗士駕  
溪風攔路吹人回君不見富貴中人如中酒折腰解醒

須五斗未妨適意山水間浮名於我亦何有余每諷詩  
悵觸不少

國雅品 博學通達詩非所優然亦有幽逸思致余讀  
其陽明先生集疏又侃侃詞切理約自是經國大手

琅邪代醉編 王陽明常遊僧寺見一室鎖封甚密欲  
開視之寺僧不可云中有入定僧閉門五十年矣陽明  
固開視之見龕中坐一僧儼然如生其象貌酷肖陽明  
先生曰此豈吾之前身乎旣而見壁間一詩云五十年  
前五王守仁開門原是閉門人精靈剝後還歸復始信禪  
門不壞身先生曰此固吾之前身悵然久之建塔以瘞

而去

西湖遊覽志 守仁之旣擒宸濠也忽傳王師已及徐

淮遂乘夜遄發至錢塘凜凜憂慄作詩云靈鷲高林暑  
氣清竺天石壁雨痕晴客來湖上逢雲起僧住峯頭話  
月明世路久知難直道此身那得尚浮名移家早定孤  
山計種果誅茆却易成頃之王師遣人追宸濠復還江  
西遂謝病居淨慈寺

藝苑卮言 講學者動以詞藻爲雕鏤之技工文者則  
舉拙語爲談笑之資若朽鑿不相入無論也七言最  
易工吾姑舉數聯如萬里滄江生白髮幾人燈火坐黃

昏半空虛閣有雲住六月深松無暑來青山日暮成孤  
坐遊子天涯正憶歸河邊宿鳥寒無影洞口流雲夜有  
聲春巖過雨林芳淡暗水穿花石溜分且留南國春山  
興共聽西堂夜雨聲天迴樓臺含氣象月明星斗避光  
輝幽人月出每孤往棲鳥山空時一鳴山色古今餘王  
氣江流天地變秋聲棋聲竹裏消閒晝藥裹窗前對病  
僧月繞旌旗千嶂暗風傳鈴柝九溪寒此王文成句也  
何嘗不極其致

緒山文錄叙說 陽明先生甲申年居越中秋月白如  
洗乃燕集羣弟子於天泉橋酒半行先生命歌詩諸弟



子比音而作翕然如協金石少間能琴者理絲善簫者  
吹竹或投壺聚算或鼓棹而歌遠近相答先生顧而興  
之遂卽席賦詩有曰鏗然舍瑟春風裏點也雖狂得我  
情

赤雅 文成謁伏波廟詩樓傳金鼓宿烏蠻魚鹿羣舟  
夜上灘月繞旌旗千嶂靜風傳鈴鐸九溪寒荒夷未必  
先聲振神武由來不殺難相見虞廷新氣象兩階干羽  
在雲端少時夢中有詩云卷甲歸來馬伏波早年兵法  
鬚毛皤雲迷銅柱雷轟折六字題詩尙不磨文成身後  
謗黜削爵與薏苡之事畧同

姚江逸詩 文成在郎署與李空同諸人遊刻意爲詞  
章龍場以後講道有得遂不復措意工拙王元美書其  
集後云伯安之爲詩少年有意求工而爲才所使不能  
深造而衷於法晚年盡舉而歸之道而尚爲少年意象  
所牽率不能深融而出於自然其自負若兩得而吾以  
爲幾乎兩墮也余以爲詩文至於文成亦可謂之自然  
矣唯其自然故見爲不措意使文成沾沾而守空同之  
蹊徑極其所至不過五才子之一耳茅鹿門謂有明之  
大家唯陽明足以當之鹿門可謂知言之選矣

靜志居詩話 新建勲業氣節文章皆可甲世特講學

金溪書言 卷三  
三  
一事讒言惟興今就先生之詩觀之其過濂溪祠云瞻  
依多少高山意曾向圖書識面真讀易詩云乃知先天  
翁畫畫有至教題武夷壁云溪流九曲初諳路精舍千  
年始及門示程畢二子云紫陽山下多豪俊應有吟風  
弄月人則先生何嘗立意樹幟張弧與洛閩諸儒異乎  
乃訾訾之口以先生學術未純并先生大節疑焉彼譖  
人者亦太甚矣

杭州府志 王文成公被謫龍場丞在途瑾遣人偵之  
將置之死行至錢塘度不能免遂乘舟佯投於江冠履  
浮水上遺詩有百年臣子悲何極夜夜濤聲泣子胥之

向浙二司及楊孟瑛皆信之命漁人索尸不得祭於江  
上家人亦成服公潛附客舟浮海至閩中入武夷山且  
將遠遁或謂之曰汝有親在未免爲累遂赴龍場

柳亭詩話 明代三百年四大奇人皆出吾浙劉誠意

方正學于忠肅王新建是也三公之才品學術惟新建  
足以兼之乃於趨事赴功之日每懷急流勇退之心一  
則曰石門遙鎖陽明鶴應笑山人久不歸再則曰何時  
却返陽明洞蘿月松風掃石眠合諸開門原是閉門人  
之語卽謂公爲儒爲佛爲仙都無不可而必於俎豆一  
席橫生些許議得無類蚍蜉之撼大樹耶

湖山便覽

按臨安志圖宋郊臺在城西南藉田在城

東南出嘉會門直南過教駿營車路院玉津園則爲藉  
田沿城西過包家山龍華寺則爲郊臺明建太極亭處  
正宋郊臺故基中阜規圓乃圖邛遺製然耳藉田則近  
今洋洋橋自王新建答錢德洪卜築天真書院詩有龜  
疇見宋田句時人遂誤認亭基爲藉田推暨其餘標識  
舛錯龍山古蹟因致全失部居

按新建以刑部主事告歸時結廬於陽明洞側因自  
號陽明其洞在宛委山有一巨石中有罅長絙龍瑞  
宮旁舊經道家之十一洞天也一名極上太元之天  
龜山白玉上經會稽山周回三百五十里名陽明洞  
天皆仙聖天人都會之所然則會稽一山皆可稱陽  
明洞天不獨此石罅也唐元微之有投簡陽明洞天

五十韻白樂天和之舊經云飛來石下爲禹穴傳云禹藏書處則指陽明洞洪景廬亦云禹穴當以陽明洞爲是第觀昌黎送惠師詩云嘗聞禹穴奇未去穿甌閩越俗不好古流傳失其真王十朋詩好古貪奇司馬遷胸中史記越山川如今禹穴無尋處洞鎖陽明石一奉明鄭善夫記云禹穴世莫詳其處然則謂陽明爲羣仙窟宅則可謂卽禹藏書處則不可茲因新建之號陽明并識於此又按宸濠生辰大宴賓僚守仁與孫燧俱在座濠宣言太后密旨詔我監國燧請密旨看濠曰不必多言我往南京汝保駕否燧厲聲曰天無二日國無二王太祖法制在誰敢違之遂被害濠復以保駕語守仁守仁佯應曰諾濠信爲助己大喜宴未終守仁以疾告退謂從者曰我回本署矣濠若遣人問疾當以卧病未起答之度我至境方以實對翌日果醫來至晚事覺亟使兵追之不及而返守仁旣奔歸草檄百餘紙盛以竹筒封其口用漆書勤王二字於筒上投於江順流而下頃刻各州縣咸知嚴爲防守卽邑志俱脫漏此一段情形第言由閩歸聞濠反卽赴吉安與伍文定倡議本傳亦未詳其事相傳守仁十餘歲時

父華延名師某教讀目十行下未及半載師語華曰  
此兒聰穎絕倫書自能讀無賴吾殺也吾將別有所  
授焉他日功名之助未知許否華曰惟先生命遂使  
人搬運碎石數萬塊於庭中堆小山高三丈命守仁  
跣足上下其間每日凡十餘次初不能登捷之使登  
刺血淋漓甚苦月餘漸覺平易如是者一年足漸厚  
寸許師曰可矣卽辭去守仁父子不解其故及宸濠  
晏時告退而遁恐追者至從問道而行緣崖踰巔履  
巉峭如平地疾若猿猱守仁恍然曰昔日吾師之教  
爲今日計也感歎無已卽遣使迎師而師已歸道山  
矣

全浙詩話卷三十一終

全浙詩話卷三十二

會稽陶元藻篁村輯

男

廷珍

編次

廷琬

仁和朱文藻映濤

參訂

同邑宗聖垣芥颿

明

趙元銘

元銘一作元銘字廷時號白雲太平人

三台詩錄

白雲嘗有栽杏詩云白髮移根總道遲何

年及見子垂垂老夫但欲添培植不問開花結子時盡



其在我而無責報之心是有德器人語

張琦

琦字君玉鄞人宏治己未進士除南大理評事  
出知興化府累遷至福建左參政致仕有白齋

竹理館二集

靜志居詩話 白齋於何李詩教盛行時別出機杼專  
以宋人爲師句如人到百年一過客吾當十日九揮毫  
千村土犬月照雨半夜江魚潮入田天上星辰離舊次  
夢中山水作真遊離歌對酒無三疊殘暑先秋退一分  
十里長亭留短樹滿天晴日落黃沙濕螢燄竹火依火

疲馬出郊山復山路入林低湖裏樹山行月黑虎窺人  
殘年滯雪開新歲五日敲冰過一州古刹今僧相見少  
新篁舊竹長來齊水邊地冷苔生髮山外民貧竹有花  
入之誠齋安晚集中猶上駟也弁州方之夜蛙鳴露說  
者以爲過而白齋出郭詩云一部新詩一部蛙則作者  
先以自喻矣

按君玉弱冠游學吳楚間每讀書至夜分與其徒吸  
水嚙面而醒自少至老刻意攻詩嘔心琢腎力去陳  
言考明代甬東有兩張琦一字廷珍慈谿人一字君  
玉鄞人廷珍爲天順間人亦登進士第有文名與海  
鹽張寧餘姚魏瀚嘉善  
姚綬齊稱浙江四子

倪宗正

宗正字本端餘姚人宏治己未進士選庶吉士  
出知太倉州入副武選諫南巡受杖終南雄知  
府有小野集

姚江逸詩 宗正與方豪鄭善夫最善故其詩云偶入  
棠陵眼難齊少谷肩又善奕京師國手俱遜之有小野  
集行世正嘉中固是有數名家也

潘希曾

希曾字仲魯金華人宏治十五年進士改庶吉  
士遷兵科給事中以言事廷杖削籍尋起官工  
部侍郎改兵部卒贈尚書有竹澗文集

金華詩錄

潘希曾詔錄  
聞蟬詩評

駱丞在獄聞蟬云露重飛難

進風多響易沈因言事不酬久遭幽繫而然此云風露  
一枝何處好乾坤餘暑幾時清以逆瑾之亂朝綱有憂  
國之心也各有寄託前後競爽

周 禎

禎字天兆山陰人宏治壬戌進士選庶吉士授

檢討有梅川集

獻徵錄 禎長於古文詞醇厚典雅有西京遺響詩宗  
陶謝清微淡遠於性理之學沿流汴源兼綜條貫一以  
朱子爲歸

徐慶亨

慶亨字世嘉黃巖人宏治乙丑進士官禮部主事有西浦存稿

黃巖縣志 徐慶亨嘗在京師與諸公咏雪有一鳥不鳴樹千峯半入雲之句人遂稱徐千峯

謝丕

丕字以中餘姚人太傅遷之出嗣叔選宏治乙丑登進士第三人授翰林編修仕至吏部左侍郎

姚江逸詩

謝丕字以中號汝湖宏治乙丑進士第三

人授翰林編修忤逆瑾削籍嘉靖初起充日講晉吏部  
左侍郎汝湖文集散失予嘗見其手書有拂面曉風霜  
有力照人寒澗水無心試看吾輩誰如子笑數同庚幾  
見孫皆佳句也而全篇不復憶矣

嚴時泰

時泰餘姚人官福建鹽運同知有牢盆集

靜志居詩話

山陰陳起侯撰浙士登科考於宏治辛

酉載湖廣中式一人嚴時泰注云辛未三甲按辛未登  
第者乃江夏人晚以右副都御史巡撫四川陞工部右  
侍郎致仕楊用修贈詩所云昂昂嚴夫子矯矯人中龍

長才抱經濟大雅含春容叩之清廟絕朱瑟任之東序  
鏗金鏞者是其人也若餘姚嚴時泰祇官福建鹽運同  
知故其詩名牢益集集中有云憶我東南來於時歲方  
晏又云暮叩西禪寺又云頗爲微官縛皆在閩中所賦  
然則用修贈詩別是一人黃梨洲徵君輯姚江逸詩誤  
運同卽侍郎未免爲起候所惑也已

王司輿

司輿越人宏治間人

紹興府志 許璋字半圭上虞人淳質苦行潛心性命  
之學其於世味泊如也嘗躡屩走嶺南訪陳先生獻章

其友王司興以詩送之曰去歲逢黃石今年訪白沙

李公挺

公挺字挹翠太平人

三台詩錄 挹翠咏紫藤花云蒙茸紫藤花脆弱全無力緣我萬年枝婀娜生顏色莫謂顏色好屈身不可道誰與爾同根而來強縈抱揮之不可去深根已固蒂吁嗟老樹成枯株爾身爾身復何爲足爲小人強攀附者垂戒意嚴詞曲盡而不盡

葛鍊

鍊字味清上虞人宏治間布衣



謝譚味清集序

味清葛公我虞名士也博學尤工詩

自名其稿曰蚓吟志謙也抑以例操云公蚤有大志然  
竟勿售也因自號味清人亦稱曰味清子夫耽寂者神  
湛嗜幽者思奇故其詩也洋洋爾冲冲爾融音叶節會  
於風雅或曰公詩高處不減孟浩然大都似六一嗜其  
知言哉

潘 璫

璫字子良號梅壑天台人

三台詩錄

梅壑淹通經史放情山水兩辭薦辟許大

府贈詩有石梁華頂峯頭酒桐栢桃源澗底詩之句

葉海峯序梅壑昆蟲百咏稱梅壑故奇詭士裹糧行游天下幾三十年卒無所遇而歸又言子行三十年見人多矣誰也麟誰也鳳誰也爲鳩鳩之佻巧而使子卒無所遇合然梅壑蓋亦不得志而自放者也

董 澣

澣字復宗海鹽人有從吾道人詩稿

靜志居詩話 夢石聞陽明講學飄飄笠渡江從之時年六十有八年長於陽明云明年從其師越中守歲風雪夜賦詩所云六十九年今夜除者是也陽明和韻云况有故人千里至不知今夜一年除復爲序其事云道

人今年已七十往來湖山之間去住蕭然曾不知其家室其子穀賢而孝謂道人老矣出輒長跪請留道人笑曰爾之憂我也以姑息吾方友天下善士以與古聖賢爲徒天地且逆旅奚必一畝之宮而後爲吾舍耶集有山居吟云青山繞湖茆結廬饑餐渴飲事無餘是非欲付樵與漁洵達者之言也

謝瑾

瑾字廷蘭由蜀徙鄞遂家焉登進士官終廣西

按察使

肩上耆舊詩叙傳

謝廷蘭以詩文擅名從范氏天一

閣得讀其蝸濡集余旣錄其七言七首他若吉州曰亂  
山過雨迷高下斜路穿雲入有無秋雲曰晨度空林迷  
馬鬣晚拖疎雨帶龍腥樵唱曰數聲去疾雲生履一曲  
歸遲月在新金山寺曰月轉天心山壓耶塔橫燈影水  
吞虹沙浦曰青裙移櫂腳雙赤金鯉出波鱗半紅幽居  
曰新聲歌罷春生榻老瓦盆乾月滿樓金奇句也

方太古

太古字元素蘭谿人少補博學弟子員旣而棄  
去遊東吳晚年歸隱金華解石山有寒谿子集  
靜志居詩詒 布衣初受經於楓山中年棄去專力於

詩不苟隨時尚句如老松萬樹霽深雪流水一溪浮落  
花白布採囊無長物烏皮凭几笑貧居平田白血流新  
雨絕壁青楓挂斷雲朝看烟雲如畫裏夜聞風雨似潮  
聲多情夜雨馬蘭草無限春風鷺粟花雲洞草花初過  
雨月臺松老不知年頗近江西詩派蓋特立之士也

發書 吳中黃省曾者越日輒治具召太古太古至不  
食主人具左右顧索餽自餽齊或出乾脯食主人音吐  
雄放滿座爲之動容王文成嘗過之擷蔬食之次日報  
謁亦以蔬進太古正色曰故人山人草具固爾伯安徵  
候也胡爲乎山人且文成遜謝改治具乃罷爲人病潔

嘗攜一鹿皮蹠兩足藉其上晚年家谿上所居有皎皎  
灘有司以乞章司空恭惠太古怒遂衆辱恭惠復與唐  
文襄相失會文襄以太宰召貽詩曰世態經秋葉浮名  
下瀨船文襄爲之悵然其任放如此

沈賓國

賓國字用之義烏人

兩浙名賢錄 賓國性英特博閱經史弱冠卽厭舉子  
業攻詩古文嘗遊越謝文正遷一見之喜曰今之長吉  
也爲詩多奇思不肯作尋常語

張震

靈黃巖人

黃巖縣志 王簡之年十五作滕王閣賦爲邵二泉王  
希文諸公所稱許補縣學生爲詩文清逸典雅又有張  
神童靈者八齡能詩謝文肅嘗以楮筆命題操筆立就  
云流水往來急青山遠近齊相期恐相失冒雨過橋西  
文肅大奇之

來宏振

宏振字汝剛蕭山人

來氏家譜 陽明先生倡道學東南公升其堂稱高足  
先生沒後而公主教天真書院者三十餘年其言以實

修爲真悟頗教爲色取人皆曰公善學先生者也晚年  
居西湖兩山之間與黃冠緇衲游飲和挹醇無能測公  
涯涘云卒之前數日歸與親舊言別手書一律而逝其  
曰湘湖黃土長明月大石蒼松待主人沐浴更衣歸大  
化笑騎元鶴駕風輪其所養可知

李經敕

經敕號後峯樂清人與章元梅夾南北閤而居  
時相唱和

溫州府志 李山人經敕號後峯律詩頗工其稱佳者  
園林變色櫻桃熟時序無言燕子歸



姚旬

旬字用宣別號可竹晚號觀頤嘉興人綬子官

鴻臚寺班有可竹居集觀頤摘稿

姚觀頤誌銘

錢福撰

嘉興丹邱姚先生高才卓見雄視

海宇予嘗詢其所知皆曰其子鴻臚公有以助之也公自七歲能屬對偶大司馬白恭敏公官浙藩時過訪先生因所見呼謂公曰白鶴迎人舞卽應聲曰黃猿抱子歸白公大奇之比長研玩詞章其詩宗杜字學沈民則與先生並行於時焉憲宗皇帝旁搜諸家典籍訪善書者鈔錄大司寇三山林公薦以冠帶舍人直仁壽殿寫

書書成受職鴻臚寺序班謝疾歸

施清

清字清仲長興人布衣

詩衡 魏畊評清仲詩云烟雲繚繞而燭然無滓予觀其翠剡樓別友詩云歸計殘年逼山樓固後登梅花三百樹且恣一高凭香寂應留夢枝枯亦類僧灑然分手處共道興堪乘簡淡有神自不妨直率

蔡紹科

紹科字宏吉號龜崖黃巖人正德丁卯鄉科終知大理府

三台詩錄 龜崖前後歷官三十年清操如一自榜於  
庭曰公庭三尺法暮夜四知心遠近誦焉所著有九蘭  
俚稿感時贅錄官程紀畧等書

管 浦

浦字宏濟餘姚人正德丁卯舉人任萊州府判  
姚江逸詩 浦字宏濟倪小野詩秋江八句重當今秋  
江其別號也

唐 龍

龍字虞佐蘭溪人正德戊辰進士由郟城令入  
爲御史歷右僉都御史總督漕運兼巡撫鳳陽

諸府進兵部尚書總理三邊入爲刑部尚書改吏部加太子太保諡文襄有漁石集

金華詩錄

唐龍終南山次灤江中丞韻詩評終南山

詩王摩詰已臻絕頂此作洞中雲似雪樹杪水如雷十字雄傑庶幾後勁龍渠春水次平田韻詩評李舒章謂起有深景然波外草堂陰五字更添幽邃雲南草堂漫興云把酒對山色讀書隨樹陰陰字韻又得一好聯送蔣石菴赴湖南詩評夜坐一聯云摩雲難度馬積石可浮舟自注積石江名禹貢曰浮於積石摩雲嶺在府西六月冰雪不消運用山川名目變動不居可稱工絕

靜志居詩話

文襄敷歷中外宦轍所至必有留題其

詩長於五律句如鶯花邊地少風雨暮春多雲氣雨中  
白山光鳥外青斷湟春水淺亂石曉山稠赤峽青冥外  
飛泉急雨中星臨河影動風入鼓聲高野水流漁市山  
雲進郭門雪埋青兕叫霞引白鴛飛細雨孤帆落疎燈  
兩岸明巖林遺魯殿畎畝變秦川野鹿避人走山禽向  
我啼流雲投浦宿倦鳥逐風回百里郵程遠三更候吏  
稀殘碁榕葉暑嫩醕菊花天巖置戍樓直峯懸鳥道斜  
客身病亦起短髮落還梳竹外青藜杖風前細葛巾移  
松邀老圃失鶴問前村均有風致

錢琦

琦字公良海鹽人正德戊辰進士知盱眙縣徵授南京刑部郎中出知臨江恩南二府有東畚集

攜李詩繫 錢東畚幼讀書山中一榻十年燈帳如墨陸師道曰先生詩皆深遠可喜有味其言姚士粦曰如空階鶴夢清山深步履遲笠外滿天雪坐久換鳴禽雨濕鷓鴣語諸句真五言長城也

陸震

震字汝亨蘭溪人正德戊辰進士除泰和令徵

授兵部主事進員外郎諫南巡被杖卒嘉靖時

追贈太常少卿予祭

金華詩錄 葵雪詩評竹垞翁謂朝房待罪詩四十字一字一碧血今讀此詩凜凜忠直之意亦有慨乎言之矣

靜志居詩話 太常力批龍鱗九死不悔裹尸之後晝晦如夜海子水溢玉河七鐵柱齊折天變豈不足畏耶詩存無多錄四十字一字一碧血也朝房待罪詩驥尾思千里葵心託萬言一身雖許國九死敢忘恩梅福冠猶在朱雲檻不存空庭對明月古道照乾坤

金華府志

正德十三年郡人陸公震時爲兵部車駕

司員外寓長安官廨九月十五日會僚客天倏作雪葵  
當軒開花翠葉葱然因以雪葵名軒賦云長安九月多  
北風倏忽飛雪迷晴空千花萬花不知處小葵獨立空  
庭中庭中積雪漸滿尺凍漏沈沈夜無跡丹英力抗朝  
日顏翠蓋還持舊風格主人愛花更愛奇夜闌秉燭獨  
對之芳心濃鬢爲誰訴欲語不語嬌生痴汝嬌詫汝情  
性別汝痴未識風雨雪寒葩灼灼空自憐慮汝雪後難  
爲妍汝心惟素赤傾日軋雪排空汝非質嗟汝自死誰  
汝惜汝死雖百汝心一般勤納汝室之北更以汝名名



我室次年四月內疏上六事諫止南巡上大怒杖下詔  
獄死焉則公之忠赤已兆於葵雪矣

應良

良字元忠號南洲仙居人正德戊辰進士辛未  
翰林仕終廣東布政

三台詩錄 南洲過嚴子陵先生祠云畏途多艱虞少  
憩嚴祠下江清山色寒毛髮欲森灑引望天北極悼往  
淚盈把風沙白日黃日斷青徐野泰社重重翬華山豈  
歸馬痛定却思痛宣驕媿詩雅用者果何爲吾取不用  
者借題杼憤意不在頌嚴然子陵人品已於江清山色

寒五字映出此詩不知作於何時以目斷青徐野句觀之當指正德庚午劉六劉七等寇掠山東而泰社重重輩則指太監谷大用等憚人不去兵定無期大臣用事者不得不任其責此公於次年補殿試卽歸吾取不用者意殆欲以子陵自托歟

田惟祐

惟祐字裕夫蕭山人正德戊辰進士有滄螺集靜志居詩話 裕夫領解浙闈時名蔚起今則知者寡矣詩如王謝子弟雖未陶鑄毋論風流文采裙屐亦自不同

按裕夫寄友詩有明月慙孤影清風想古人之  
可頗饒逸致竹垞稱其裙屐亦自不同信然

徐愛

愛字曰仁餘姚人正德戊辰進士知祁州歷官

兵部郎中

姚江逸詩 文成之學得曰仁而門人益親曰仁之亡

文成有喪予之慟其詩工力未深而不落凡俗

戴師觀

師觀號筠溪太平人正德辛未進士官吏科給

事中

三台詩錄 筠溪正德庚午鄉闈既出口占一詩有倚

闌試看青鋒劍萬丈寒光透九重之語識者知其必為  
解頭榜發果然

盧 煦

煦字子春東陽人正德二年進士知長垣縣入  
為刑部主事尋出為四川按察僉事遷湖廣布  
政使參議後撫鄖襄

檀雅溪盧氏事蹟 公弱冠登科九試方成進士人或  
笑之故有九科不第人皆笑四十無聞我自知之句

胡 佩

佩字時鳴湯溪人正德五年進士官萍鄉令有

隴南集

金華詩錄 隴南婺源憶歸詩有云百年付托渾無地  
兩字功名直抵錢又云宦況如吾真可笑人情似此卻  
如何其思歸之心可謂切矣

駱用卿

用卿字原忠餘姚人正德戊辰進士官兵部員  
外郎

姚江逸詩 用卿嘗奉使過山西題韓信廟李空同見  
之曰此題淮陰絕倡也山西士大夫因空同言遂作詩  
板懸之倪小軒曰近日不信詩而信人也如此哉兩山

仕宦不達嘆曰天生駱兩山顧作相埋術士乎

徐咸

咸字子正海鹽人正德辛未進士除知河陽州  
入爲兵部主事終襄陽知府有東濱集

靜志居詩話 東濱句如路自窮厓入人如倦鳥還千  
年牛首寺一日虎跑泉客醉黃花酒僧供白雪糕棘林  
花落子茹屋燕將兒山遠不聞漏夜寒疑有霜頗類賈  
島佛

董穀

穀字傾甫涇子舉人歷知安義漢陽縣有參龍

子西存前後集

海鹽縣圖經 穀好學工詩宦歸安貧自怡當晝炊烟  
未舉猶散步澈墅湖濱吟咏自若後侍父游王守仁之  
門學識大進有性論一篇其悟後筆也

管邦宰

邦宰字良卿號二洞黃巖人正德癸酉鄉科

三台詩錄 良卿竹枝詞云湖烟出沒湖山高湖風那  
肯回郎桹含情欲截西流水倩誰爲買并州刀蘇小門  
前柳繫船柳絲離恨相縈連蠻腰學得昭陽舞憔悴妾  
心終自憐竹枝別有一種婀娜筆墨其着語亦貴在不

雅不俗間與絕句不同此爲得之

胡東

東字時震湯溪人正德癸酉舉人官醴陵令自號古愚

金華詩錄 楓山先生與書云時震足下別來許久不知作何課程大率學者誦法孔孟不知舉業文字還有一層工夫卽如朱呂兩大儒講學金華卒啟何王金許四先生之傳此吾郡重擔也足下資學甚粹可屬大任幸相與勉之古愚復書云濫廁門下猥蒙老師屬以吾鄉重擔顧東何人可以堪之然不敢自棄鵲鳴旦氣



潛想教言似覺有得早起亟書於冊以俟他日質証第  
豹之一斑管之一隙無當全體須如登高者懸崖撒手  
方是了悟東恐不可幾及矣惟望老師循循善誘俾獲  
庶幾又臨終口占云解組歸來已日西圖書四壁頗淒  
淒吾今可向師門復不負當年教鐸提

金賁亨

賁亨字汝白號一所臨海人正德甲戌進士仕  
終福建提學副使

三台詩錄 一所潛心理境發明儒先之學慨然以斯  
文爲己任立身行政多卓然可傳於後隆慶間御史謝

公疏請建崇正祠祀之嘗有夜坐懷容菴詩云清宵已  
無暑獨坐轉淒然鶴髮憐朋舊鷄鳴感歲年爲巢慚我  
拙登岸擬君先試看天邊月生明直到圓末句卽擴充  
之義指點妙於不腐

華愛

愛字仁卿鄞人正德甲戌進士歷官南兵部職  
方郎出知桂林府事有石窗集

浙江通志 愛性溫雅洞見肺腑家居日以詩書自娛  
興至輒攜其所知夷猶於廻溪疊嶂間見雲蒸霧變木  
秀卉榮則欣然忘返工行草爲詩希盛唐風格每以王

維杜甫爲主

胡斐

斐字時章湯溪人正德甲戌進士除江夏令仕  
至刑部主事

金華詩錄 比部詩存者少文齋遺筆載採木紀事詩  
十五首今錄其二按第一首八月廿一日省下解舟云  
解纜洪都秋氣清同官離別不勝情正當令進賢時也  
第十五首木過婺源到饒河喜將竣事六月朔日也詩  
云去秋從役經年久此日胸懷可暫開豈當日採木亦  
卽官出差歷一年之久耶

汪應軫

應軫字子宿山陰人正德丁丑進士改庶吉士  
諫南巡廷杖出知泗州嘉靖初召復館職尋授  
給事中出爲江西按察僉事有青湖文集

靜志居詩話 青湖論學詩云語道豈捐陸扶世當宗  
朱黷然思聖功二家皆眞儒審擇於鵝鹿之間非偏黨  
陽明可知

陳沂

沂字魯南鄆人

甬上耆舊傳 沂以醫籍居南京八歲能摹古人畫十

歲能詩十二歲作赤寶山賦傳誦人口中正德丁丑進士改庶吉士授編修進侍講忤張孚敬出爲江西參議山東參政轉行太僕卿致仕杜門著書絕意世務書學大蘇旁及篆隸繪事皆稱能品所至好遊名山水皆有詩紀晚與顧華玉遊歷長干諸寺賦咏尤多文采照映一時有拘虛詩集及詩話若干卷

許相卿

相卿字伯台海寧人正德丁丑進士官兵科給事中改禮科致仕有雲村集

靜志居詩話

雪村澹於宦情居紫雲山四十年風花

雪瀑遊屐遍於巖椒而不一入城市其卒也聞人嘉言  
輒以詩云平生城市無雙屐何物榮衰到兩眉蓋實錄  
也詩取適意集出其手刪自序謂棄其脫遺不可讀者  
存其餘可讀者自題絕句云雲村老病語多噉造次詩  
成雜宋腔還溯開元論風格拾遺壇上樹旌幢由今誦  
之諸體亦自清潤不全雜以宋腔也若老如舊歷渾無  
用癡盞殘燈亦暫明此則宋腔之佳者

蔣泮

泮字良潔仙居人正德庚辰進士授工部主事

三台詩錄

良潔嘗催稅荊州清節自勵回部光澤王

贈詩有清風千古人難比白日歸鴻數卷書之句陞員  
外督理倉廩中貴揚集思中傷之旣而嘆曰吾閱人多  
矣若蔣副郎冰心雪肝未數數覩也遷郎中奉使道卒  
貧幾無以殮

胡 森

森字秀夫湯溪人正德庚辰會試中式嘉靖九  
年辛巳賜進士第授南主事歷南鴻臚寺卿有

九峯集

金華詩錄 九峯與王浚川遊浚川以唐人正始稱之  
其詩頗有標格詩粹不盡所長得青陽胡氏家乘錄之

繼又得其七世孫胡湯洋所呈殘本增錄畧具梗概他  
如從此心頭共湖海不論踪跡偶西東身世孤舟隨處  
繫江湖白髮共愁長春水半空青雀舫平湖萬里白鷗  
天應無真相黃金骨且引芳醇碧玉壺澗戶苔封時過  
鹿石床客少只留雲微風出樹芳仍合曲澗流雲翠自  
封句外有神不專工對仗

周祚

祚字天保山陰人正德辛巳進士除來安知縣  
擢給事中有定齋集

明詩綜 孫仲可云詩以撥去陳故爲尚天保樂府婉



而厚古詩醇而鉅近體脫畧纖冶非自空同出耶

張達

達字懋登餘姚人正德辛巳進士改庶吉士歷  
刑科給事中卒贈光祿寺少卿

姚江逸詩 達効武定侯郭勛妖賊李福達謫戍遼陽  
與夏良勝周叙等唱和聞母死賦詩此身原只是親身  
死爲吾親認得真

楊言

言字惟仁鄞人正德辛巳進士除行人擢禮科  
給事中以言事廷鞫謫判宿州稍遷吏部郎再

謫知夷陵二遷至湖廣參議有集

用上耆舊詩叙傳 讀楊參議言疏草忠憤之氣塞於  
兩間而其詩婉秀明麗幾近子房之貌余旣錄詩十三  
首復採其佳句曰月落明漁火風輕穩釣舟曰短竹生  
幽嚮高松落午陰曰沙寒稀荻鴈木落露松虬曰水漲  
鷗移渚芹香燕獵泥曰孤舟虛白日雙鬢落青絲

張文宿

文宿字拱辰仁和人正德癸卯鄉薦官晉江令  
分省人物考 文宿遭讒落職就西湖築一小樓湖中  
置一舫與郡中沈清門方十洲輩結爲詩社遇良辰輒

登樓放舟賦詩作會其詞華沈著不爲浮綺爲一時所  
取宗

葛木

水字仁甫上虞人正德中進士歷刑部出知淮  
安府遷山東副使終山西參政

紹興府志 木爲人孝友清約能世其家嘗夜渡錢塘  
風波忽作木安坐賦詩云心與神明合風濤夜不驚可  
以見其平生矣

李長

長字復之縉雲人第進士授新昌縣擢戶科給

事中武宗時謫福寧州判

處州府志 黔國公沐崑結中貴構陷藩臣沈恩等  
外莫敢言長獨抗疏忤旨逮詔獄賦詩云巨室因知  
得罪言官非是容情錄拖月下歸園土猶作趨朝  
玉聲久之貸謫福寧州判冒瘴疾卒

楊珂

珂字汝鳴號秘圖餘姚人

姚江逸詩 珂字汝鳴號秘圖從王文成講學不以科  
舉爲事自放於山水之間天台四明題咏殆遍每遇白  
雲滿谷負巨甕納之紙封其口置之草堂俟天日晴朗

引針縷縷起於紙隙縈繞梁間呼朋以爲笑樂祠宇觀  
側石橋時爲暴漲所壞秘圖書醉卧石三字於上水亦  
迂道避之其高致如此所臨晉唐帖得其神似書法與  
徐文長齊名而王元美故以險怪目之以一時藝苑共  
走太倉秘圖文長皆不屑也

馬洪

洪字浩瀾仁和人自號珎石山人一作錢塘人  
古今詩詞紀事 錢塘馬鶴窗清修苦節所居去飛來  
峯不十里以貧累不能數往因題詩曰飛來峯在腳邊  
頭十五年中兩度遊說與山林應笑我先生忙到幾時

休既悲其窮復賞其達

按浩瀾善詩咏而詞調尤工皓首韋布含吐珠玉哀然若貴介王孫也其詞有花影集自謂四十餘年僅得百篇又有和曹堯實遊

仙詩百首一時盛傳之

文藻按浩瀾詩不多見吳越所見書畫錄載陸明本贈沈石田墨梅長句石田題詩浩瀾三和韻云飄飄雙袖拂紅塵江北江南賞迤春兔穎寫生常贈客龍方起死不傳人世情好處花依舊泉味甘時茗試新翻笑十年前事錯往來光範與平津玉骨冰肌不浣塵十年看過洛陽春騎將駉裏如公子畫出芙蓉似美人黃葉山岡詩吊古青梅時節酒常新狂來豈怕銀河遠便擬乘槎去問津蓬萊山謫下凡塵滿腹才華滿面春折短柳枝頻送客放低棋子愛饒人校讐蘭室醫方秘變化黃荃筆法新惆悵別多良會少三年三見浙江津自跋秋江人品素高且風流灑落作詩無烟火氣寫生名家而不專指笑蓉世人以張芙蓉稱之蓋重之也醫術常利濟於人豈非神仙中人耶秋江姓張氏宏治乙丑訪沈石田賦詩識意石田

和之陸明本乃畫梅贈石田而書其詩諸賢  
皆和浩瀾詩亦在卷中附載於此以窺其槩

何舜賓

舜賓字穆之號醒庵蕭山人成化五年進士官  
至監察御史

菊坡詩話 醒庵詩極蘊藉有味如寄京師諸友云半  
生踪跡寄江鄉悵望青雲隔渺茫泣玉有誰憐卞氏彈  
冠空自說王陽夢隨芳草春宵短思入東風客路長却  
憶詞垣衣繡侶馬蹄曾共蹋槐黃此其未遇時所作可  
謂怨而不怒

仇復

復吳興人

珊瑚網

法書題跋

諸名賢垂虹別意詩正德戊辰中秋浙

江紹興府儒學訓導長洲戴冠叙畧曰休寧戴昭年富  
質美予教紹興府學時與其父思端有同譜之好往來  
情義甚篤然思端業賈什九在外不能內顧恐昭廢學  
負所稟因挈來游於吳訪可謂師者師之初從唐子畏  
治詩去從薛世奇治易繼從霍東卒業昭爲人言動謙  
密親賢好士故沈石田楊君謙祝希哲皆吳中名士昭  
悉得與交交輒忘年忘情及昭學漸就緒去家且久不  
能無庭闈之恩將告歸衆作詩送之君謙詩云垂虹拂



軌過因題卷云垂虹別意蓋垂虹者具地石杠之名也  
送昭必於此地爲別使送者可及夕而返也昭自來請  
序昭字明甫同余出唐道國忠公胄之後蓋徽之雙溪  
世家云吳興仇復詩曰秋風振喬柯客子歸意托落日  
垂虹橋停橈待明發渺渺兮予懷望望兮水濶睽違不  
足道鄙吝誰我豁

邱吉

吉字大祐歸安人有順信齋集

靜志居詩話 瞿宗吉以香奩八題見賞於楊廉夫自  
是以後從而效之拾西崑之唾餘雜以鼓詞院曲之穢

字誦之欲嘔吳人劉欽謨倡無題詩初不見好而一時  
和者紛紛衆推吳興邱大祐爲最故沈啟南贈詩有西  
漢人材東閣外六朝詩句北窗中之句大祐無題五首  
中云只好詩中嘲阿軟寧知花底活秦宮絳桃成子花  
無色銀燭燒心淚有痕在彼法中差勝而全首未工他  
詩若楊柳一堤沽酒路木蘭雙楫載書舡吳湘東去皆  
連海天目西來總白山斜日半林金翡翠青雲千尺玉  
浮圖白鴉谷口霜摧栗黃鶴樓前水到門簾外雨多龍  
洞滿屋頭松老鶴巢稀山家雲濕長垂箔水館風多不  
置窗醉筆題詩蕉葉徧夕陽催酒玉瓶空青山無雪梅

全宋言言  
卷三  
三  
花後細雨生寒燕子前賀監酒舫湖左右杜陵茆屋讓  
西東消磨益益茆柴酒辜負烟靄柳栗條野寺夕陽銀  
杏葉水村涼雨石楠花松葉微風三竺路荷花細雨六  
橋舫又題岳鄂王墓云南國有人論歲幣中原無日見  
官軍頗有思致大祐自號執景道人賦才最敏同郡詩  
家如唐庠惟周唐廣維勤張淵子靜沈庠彥庠皆奉之  
爲師友故有吳興領袖之目

鍾海

海字巨川海鹽人爲懷遠丞落職復起萬安丞  
子梁貴贈刑部主事

攜李詩繫 鍾巨川性剛直雖起家掾吏而張靖之特  
敬其人爲懷遠丞靖之畫家山看月圖送之題云小山  
孤月靜流暉石磴高寒酒力微清賞正濃眠未穩夜深  
松露濕秋衣未幾與令不合落職後事白起丞萬安不  
數月復歸有詩云乏燭樓臺宜月夜單衣兒女怯秋風

魏 偁

偁字逢卿鄆人官石城訓導有雲松詩畧

甬上耆舊詩 雲松詩畧歐陽鵬所選於三千餘首中  
止錄三百四首所遺必多佳者

王 毓

毓字用賢鄞人

寧波府志 用賢嘗慕宋廣平林和靖之爲人植梅庭  
下雖凝陰沍寒焚香默坐對之不去因作書模寫標格  
又善賦詩工隸書時稱三絕自號香雪坡老人先遊錢  
塘無識者題於吳山廟壁曰行盡錢塘數十家無人爲  
我煮新茶一襟清思難消遣嘔出胸中萬斛花由是人  
競邀之拂衣而歸

滕祥

祥字時吉蘭溪人有百雲譜

金華詩錄

百雲者慶錦元英定閒商仍淨密奇輕浮

重嬾飛棲油高低五片濕歸斷度連絮同癡幻香陣鱗  
法慈天風烟火龍山峯林野洞徑磯水溪海池浦鄉春  
夏秋冬曉夕晴午陰清白紅蒼黃松窗袖友就邀排穿  
談懷夢探遲卧漁樵耕牧掃擬怕枰醉歌書躡祛攜贈  
凌遏迫共百題每題作七律一首桐城吳紹廉見之謂  
缺稍雲因又廣十題曰稍穗梨岫甕雁素停宿塞又以  
前題作五律百篇詩不勝載

曹 辰

辰字彥聚金華人有咏菊六六吟

金華詩錄

曹氏家傳彥聚自號若耶子健於爲文與

全宋言言 卷三  
同人結社得月軒一日赴會以事阻日晡始至同社皆散去獨坐軒中見砌下菊花盛開成近體三十六首曰六六吟錄錄青衿隊中無可表見而晚節不渝以之自憾亦以之自寓云

鄭孔庠

孔庠號樾溪西安人有樾溪集

衢州府志 樾溪穎敏絕世每過市書林輒取其書甲乙之業已默誦仍與客談而記不輟年十六遊武林盡和梅花詩名輩嘆賞人士讌集約歌早朝詩以勸觴客他客或記一二孔庠徧代席中人歌之衆謝不及也詩

多不留草弟子識其什之一名樾溪集

沈仕

仕字子登自號青門山人杭州人

王道恩青門詩序 子登身本貴介而野服浪遊詩篇雅調遠近齊稱兼能遊藝觀其樂府古詞雜咏游適之作至於觀覽京都覩制度禮樂之鉅盛擬議應制形容功德頌美摭筆麗而有則蓋仕故少司寇省菴之子習其家學窺國家之光而講中外政俗之變非生於窘窶崛側者比也

邵琇



琇字佩之富陽人仕爲四川崇慶州判官有曉  
峯集

浙江通志 琇在蜀多託吟咏爲諸公所稱至以佳句  
相呼如張三影云

黃嘉仁

嘉仁號半山餘姚人有半山遺稿

姚江逸詩 嘉仁號半山九霄之子九霄以畫菊名世  
共知之而半山之詩情致宛轉知之者鮮矣

楊承鯤

承鯤字伯翼鄞人

甫上者舊傳 伯翼少喜談班馬二史工詩年十五爲  
諸生沈明臣見而奇之曰獬兒難與爭鋒因呼爲德祖  
以是有重名爲人守古獨行於當世少所許可嘗與八  
言王弇州論歷下朗鑒不足歷下持詭道所得者古人  
匡郭耳旣以太學生北上作薊門行名滿京都久之歸  
里於城南築小園嘯咏其中文章高妙詩於五律爲長  
城善法書遺集二種傳於世

葉太叔

太叔字鄭朗鄞人

鄞縣志

鄭朗工詩沈明臣見而奇之曰此今日李王

孫也遂以定交以其詩呈張時徹深爲賞異有故人令  
吳中邀修邑志太叔旣爲輯定獨署己名令以百金置  
酒爲壽欲得附名纂撰太叔拂然曰著書千載事豈容  
貨取遂束稿而行其詩草偶有不愜悉付諸火旣悔而  
追錄所記憶名思烟集

汪禮約

禮約字長文寧波人

甬上耆舊傳 長文中丞王之孫石孟山人坦之子從  
學沈明臣得其指授由是名益重所居曰大雷山房人  
望之若三壺仙宅坐卧一樓樓左偏開一穴下置容五

石缸使人鏟其外每一詩成輒手按之投穴中積歲缸滿家人發戶出紙好事者取之稍傳布人間其著作甚多後散失僅存遺詩一卷四明游籍一卷

胡遷

遷字喬遷

祐山雜說 故人胡丈喬遷曠達不羈之士也家頗寥落一日詣余出一詩於袖中云藿食鵲衣鬢已秋三喪淺土淚橫流登堂稽顙無他話見說先生有麥舟讀之慘然爲賻之

葉子奇

子奇字世傑龍泉人以薦主巴陵簿

柳亭詩話 葉子奇過白羊湖詩客思官程意轉迷湘江南去草淒淒待尋無樹人家宿免得中宵謝豹啼金南陵曰此卽打起黃鸝兒之意葉字世傑龍泉人以薦主巴陵簿

盧可久

可久字德卿永康人

金華詩錄 永康盧可久字德卿嘉靖初聞陽明子講學姚江往受業焉退歸一松山房恍然覺有浮翳靜掃皎然中天之象已而更相參証所造益密遂約同志聚

講五峯石室春秋二會環而聽者嘗百餘人其論學云  
不落階級不涉有無又云原無所存更有何亡原無所  
得更有何失賦靜坐詩云習靜爭知真靜難也無動靜  
也無端由來一樣春風好不用窗前草色看蓋不免由  
良知而入於禪學也

陳鶴

鶴字鳴野山陰人世襲百戶有海樵集

沐雲詩話 余嘗見鳴野孤月長隨棹寒潮不到門頭  
使躁心盡釋及薄游兩見雁歸塞多病却憎花滿樓之  
句翻覺淒然

靜志居詩話

海樵家居恠山之麓金庭閣老其女夫

也山上有息柯亭傳是閣老所建而海樵集中酬周山陰張會稽攜酒見訪之作中云相攜直上息柯亭恐是海樵故宅中物矣五言如近海潮通郡連山瘴入樓山川留別夜月雪望鄉人孤月長隨棹寒潮自到門繞廬松月暗穿竹水聲齊明月幾家好故人今夜俱七言如床下鳴蛩偏入夜風前白苧不宜秋風塵會面猶難卜世事傷心只自知細雨殘燈岐路酒清江紅葉寺門舟薄游兩見雁歸塞多病却憎花滿樓高士遠棲滄海曲好山多近永嘉場山深倦鵲猶依樹風定飛螢不上樓

比於田水月雖才鋒不及而鑄詞差醇

時魁

靜志居詩話 柘湖風神韶亮得無累之神絕句小詩  
尤見清拔

潘淵

淵字默之天台人由明經仕馬平知縣有玉屑  
吟雙澗集

天台縣志 淵工吟咏嘗進嘉靖龍頌爲璇璣回文詩  
數百首



陳公綸

公綸字渙中臨海人有采碧堂集

臨海縣志 渙中善爲五言律詩清新宛麗著有采碧堂集其自序以爲本東野農夫因徙郡城誦讀章縫行迹不出其鄉獨六客錢塘平生好爲詩歌恥趨謁自禁諛語以玉室名其詩不欲著姓字云

按渙中一字古臺以博通典籍見重於時詩在中盛之間書法偏肖玉局其五律如濯纓千澗裏步履萬花中水落孤舟渡烟空一雁飛溪光分石髮厓色亂苔衣等句俱佳

蔡學用

學用字子行初字用拙號青山鄞人布衣

甬上耆舊詩叙傳 屠田叔嘗過先忠毅公客四座或  
問蔡子行近詩何句最佳田叔曰蔡詩若草綠鵝兒喜  
天青鶴侶高真不亞杜陵也先忠毅公亦時時許之

屠田叔

杲堂集 屠田叔先生自言其詩凡三變早年尚正聲  
故多蟬緩中歲更尚氣節似饒遠韻老來漸知律細益  
尚清真因題其七十以後詩曰老言別一卷知詩氣候  
未有不善變而能工者也

聞龍

龍字隱鱗鄞人處士有行藥吟幽貞廬詩集

明詩綜 屠田叔云隱鱗詩如溪上人家曲几疎窗長  
與水雲弄色王右仲云隱鱗詩清和穩暢卓然成家

陸寶

寶字敬身鄞人官內閣中書有霜鏡集

明詩綜 曹能始云中翰詩道遙容與蟬蛻塵埃之外  
王百穀云敬身詩篇麗逸讀之惟恐其盡屠田叔云敬  
身古詩敦厚得江謝門風近體深沈具高岑家法  
菊坡詩話 詩意無論深淺能無俗塵便有趣味吾最  
愛陸敬身齋居云層層樓榭枕松關每到花時獨不閒

酒榼茶鎗人去後窗前一幅米家山

陶 匏

匏字子白秀水人

櫺李詩繫 陶匏字子白秀水人能詩文善書與歸季思輩讀書獲秋菴風月之際狂歌長嘯興趣所極或窮日夜不返其豪致如此年二十而卒遺文散軼見廓園集者有亦道青年難遽世不堪白面向時人之句惜不得全首錄之

應明德

明德字養虛臨海人官終黃州守

三台詩話

應黃州養虛明德任秋曹時楊椒山正在

獄染疫病提牢官曹某受時宰旨絕其醫藥危甚養虛極力保護親檢湯藥十四日方得汗又說堂出之外庫奸黨咸禁之勿爲奪其母在家聞之亦寄書謂楊公正人當加意保全養虛度椒山終不得直作詩生弔之曰汝與何人遊地下我將何面立朝端蓋深痛欲疏救未能也王弇州記應生事云楊仲芳且死屬家人藏予血三年而碧者必有以報應生王穉登黃州太守行云瑯琊長公忠愍友千言題贈黃州守司馬文章董狐筆一死一生皆不朽應臨海人或作海寧者誤

蔡策名

策名字去疾黃巖人

三台詩話 黃巖蔡去疾策名以詩酒自豪遊太倉王  
弇州之門席間酒酣屢舞失足池中碎玉杯罰作賦其  
詞甚美弇州愛其才贈詩有小飲猶傾三百杯大醉須  
眠一千日之語又曰袖攜天台石吐作弇山雲豪氣一  
時無兩

姚惟芹

惟芹字惟城號東齋嘉興人綬孫甸次子國子  
生有東齋稿畧

東齋稿畧序 東齋豐姿雅度馳譽士林日與其兄鶴  
涇子季弟雪汀子倡和頡頏蔚然爲吳中勝事予嘗謂  
東齋詩醞藉工緻宜讓鶴涇而渾雄曠爽之氣乃若過  
之